

per persunas d'instrucziun, mainasculas e cussagls da scoula



Nr. 3 2022/23

Part generela

Evaluaziun dal ram ERC

In favrer 2022 ho l'inspectorat da scoula cumanzo cul 5avel turnus d'evaluaziun (Valütaziun e promoziun da scoula, VPS 2021-2026). Cun VPS valütescha l'inspectorat traunter oter la realisaziun dal Plaun d'instrucziun 21 GR e contribuescha uschè a la garanzia da la qualited ed al svilup da las scoulas populeras grischunas i'l sen da l'egualited da las schanzas. Parallel cullas evaluaziuns da scoula vain da prümavaira 2023 fatta ün'evaluaziun specifica dal ram ERC (etica, religiuns, cumünanza), e que in l'inter chantun. Sper 1-2 visitas ill'instrucziun per lö da scoula vegnan fattas intervistas cullas persunas d'instrucziun visitadas ed üna consultaziun online cun tuot las persunas d'instrucziun chi instrueschan ERC in scoula primara. Ün barat professionel chi ho lö ils 7 gün 2023 cun rapreschantants da mincha team da scoula e cun las/ils mainasculas conclüda l'evaluaziun dal ram ERC.

Promoziun da la sandet e prevenziun

L'Uffizi per la scoula populera ed il sport USS/AVS e l'Uffizi da sandet haun decis da fer part a la 'Rait da scoulas21 – rait svizra da scoulas persistentas chi promovun la sandet'. Il böt: La promoziun da sandet e la prevenziun staun a disposiziun a tuot ils iffaunts e giuvenils, a tuot las persunas d'instrucziun, a las/als mainasculas ed a tuot las ulteriuras persunas involvedas in scoula.

[Ulteriuras infurmaziuns](#)



Cussagliaziun per genituors da lingua es- tra

La brochüra 'Discorra cun me e taidla a me!' as drizza a genituors da lingua estra d'iffaunts suot tschinch ans, es però relevanta eir per genituors d'iffaunts ill'eted da scouline. Il cuntgnieu da la brochüra spordscha tschegns ed infurmaziuns, cu cha genituors paun sustgnair a lur iffaunts cun imprender la prüma lingua. La brochüra renda attent süll'importanza d'imprender la lingua locala, per exaimpel per chatter amihs ed amias, per as sentir bain cò e per avair üna buna partenza in scouline ed in scoula. Illa part cullas adressas as chatta spüertas da cussagliaziun e da sustegn per genituors. La brochüra sto a disposiziun in differentas linguas.

[Ulteriuras infurmaziuns per telecharger](#)



Swiss Polar Class

Swiss Polar Class es ün program d'imprender gratuit chi sto a disposiziun a persunas d'instrucziun, a scolaras ed a scolars, però eir a persunas interessedas chi vöglian scuvrir las regiuns polaras. El as drizza a scolaras e scolars ill'eted da och fin dudesch ans. As basand süllas activiteds scientificas dal Swiss Polar Institute sun gniews s-chaffieus cuntgniews d'imprender davart l'Arctica e l'Antarctica. Ils cuntgniews as cunfaun cul Plaun d'instrucziun 21 e trattan il muond fascinant da las regiuns polaras.

[Pagina d'internet Swiss Polar Class](#)



Gö da politica

Tal proget 'Gö da politica' as tratta d'ün gö strategic per la 8 e 9vla classa. Il gö ho l'intenziun d'incler meglder la furmaziun politica e da promover l'incletta traunter las differentas regiuns linguisticas. In mincha runda dal gö piglian part quatter classas da differentas regiuns linguisticas insembel cun lur personas d'instrucziun. Quistas classas s'occupan ill'instrucziun cul sistem politic da la Svizra ed invaintan ün'iniziativa dal pövel fictiva. In ün seguond pass s'incuntran las scolaras ed ils scolars a Berna düraunt duos dis. Düraunt quists duos dis surpiglian ils giuvenils la rolla da parlamentar e parlamentarias e debatteschan davart lur iniciativas. Il seguond di piglian las scolaras ed ils scolars s'vess plazza süls sezs dal Cussagl naziunel. In occasiun da l'occorrenza dals 28 fin 29 november 2023 bivgnantaro il president dal Cussagl naziunel, Martin Candinas, persunelmaing als partecipants.

[Infurmaziuns davart 'Gö da politica'](#)



Free. Fair. Future

Il fond per la prevenziun dal tabac ho preschanto l'an passo a la publicited il nouv program d'iffaunts e da giuvenils Free - Fair - Future. I'l ram da quist program ho éducation21 sviluppo - insembel cun classas da scoula - üna nouva spüerta per l'instrucziun sül s-chelin secundar. Quist appellescha a la respunsabilitel pel tema. La respunsabilitel dals giuvenils s'vess, ma eir da la societel sco united. La scoula dess guider als giuvenils sül tema tabac e consüm da tabac ed incurascher ad els da's fatschender culla tematica. Ils giuvenils paun scuvrir s'vess las varts sumbrivaintas dal tabac e trer conclusiuns per lur cumportamaint. Lotiers tuocha per exaimpel eir, cha nu vain be tematiso il consüm da tabac, ma eir la cultivaziun ed ils connexs globels, economics e giuridics dals umauns chi sun tratschulos in quista chosa.

[Spüerta per l'instrucziun da Free. Fair. Future](#)



Augmented Reality illa scoula populera

Augmented Reality (AR) schlargia il muond reel cun agüd da smartphones, tablets u UR-brils cun infurmaziuns, purtrets ed/u elemaints da 3D. Illa scoula populera e sül s-chelin secundar Il vegnan per exaimpel cumpletos ils models e las visualisaziuns da las ciencias natürelas cun Augmented Reality interactivs, ed eir ils experimaints as laschan cumpletter ill'instrucziun cun elemaints virtuels. In üna contribuziun da blog da Janine Küng (SAPLU) vegnan discutos il potenziel e las sfidas da quista nouva tecnologia scu eir il stedi actual da las scoulas.

[Blog davart Augmented Reality](#)



Campus da sted swch 2023 a San Galla

Il 132avel Campus da sted interchantunel da 'Scoula e furmaziun supplementera svizra' ho lö dals 10 fin ils 21 lügl 2023 a San Galla. Illa spüerta figüeran circa 200 cuors davart differents temas actuels da scoula. Ils cuors paun gnir reservats online.

Infos dals cuors ed annunzcha



Cordiels salüds

Chantal Marti-Müller
Mnedra USS

Andrea Caviezel
Mnedr inspectorat da scoula

Part regiunela

Accent tematic 2022/23

Nos Accent da quist an da scoula es dedicho a la tematica 'Valüter'. In nos barat dals 29 marz 2023 approfondinsa la funcziun da las valütaziuns ill'instrucziun, la tenuta da basa, puncts da referenza per la valütaziun, agüds per valüter e fuormas da valüter. Quist barat inua cha vegnan invidedas duos personas d'instrucziun da mincha lö da scoula dess pussibilter ün imprendder ün da l'oter. Las partecipantas / ils partecipants dal zievamezdi rapportan las cugnuschentschas dal barat aint in lur teams. Cun ün ingaschamaint minimel vulainsa ragiundscher ün profit maximel per mincha team da scoula.

Termins

Data	Occurrenza	Adressos
27-01-2023	Assegnaziun provisorica	6. cl./1 R
27-01-2023	Attestat da semester	Tuots
15-02-2023	Cussagliaziun INSULA	MS
22-02-2023	Cussagliaziun INSULA	MS
29-03-2023	Accent tematic 2022/23: Valütaziun ill'instrucziun	Tuots
12-04-2023	Assegnaziun definitiva	6. cl./1 R
30/31-05-2023	Examen da recuors	6. cl./1 R
07-06-2023	Barat regiunel a Zernez in connex cull'EVA dal ram ERC	PI primara Tuots MS
13-06-2023	Occurrenza d'infurmaziun a Zernez	Tuots CS/MS
15-06-2023	Occurrenza d'infurmaziun a Samedan	Tuots CS/MS

Cordiels salüds

Inspectorat districtuel Engiadina-Val Müstair-Samignun
Bettina Salutt, Urs Kühne, Curdin Lansel

